

12 JAN 1996

Mahathir-Cacat

PM MAHUKAN PELUANG PEKERJAAN GOLONGAN KURANG UPAYA DITAMBAH

KUALA LUMPUR, 12 Jan (Bernama) -- Datuk Seri Dr Mahathir Mohamad berharap golongan kurang upaya terus diberi peluang bekerja di sektor awam dan swasta di negara ini.

Perdana Menteri berkata pengwujudan peluang pekerjaan dan pengambilan mereka bekerja tanpa prasangka negatif boleh meningkatkan taraf kehidupan golongan itu sekaligus memberi jaminan masa depan bagi generasi akan datang di kalangan orang kurang upaya.

"(Dasar) Pengisian satu peratus peluang pekerjaan bagi mereka yang kurang upaya di sektor awam perlulah dilaksanakan dengan lebih agresif dan sektor swasta juga harus mencontohinya," katanya ketika merasmikan majlis untuk orang kurang upaya di Pusat Dagangan Dunia Putra (PWTC) di sini.

Majlis Perdana Menteri Bersama "Ke Arah Kecemerlangan Orang Kurang Upaya 1996" itu dihadiri oleh 2,000 orang kurang upaya dari seluruh negara.

Dr Mahathir berkata kerajaan mengambil berat terhadap mereka yang kurang upaya dan ia dibuktikan melalui beberapa tindakan termasuk pengecualian cukai pendapatan untuk golongan itu serta keluarga mereka.

Dalam Belanjawan 1996, kerajaan memberi pengecualian cukai pendapatan kepada keluarga yang mempunyai anak kurang upaya daripada RM1,600 seorang kepada RM5,000 seorang.

Pelepasan itu juga diberi kepada pembelian alat bantuan asas daripada maksimum RM3,000 kepada RM5,000 serta potongan cukai bayaran perubatan daripada RM1,000 kepada RM5,000.

Dr Mahathir berkata kecacatan seseorang itu bukanlah penghalang baginya untuk maju dan bergerak sama dalam membangunkan sesebuah negara.

Katanya kurang upaya bukan dan tidak perlu dilihat sebagai suatu masalah dalam konteks pembangunan sosial ataupun ekonomi.

"Suasana sekeliling masyarakat yang mempunyai dinamisme positif kepada orang kurang upaya daripada segi penerimaan dan sokongan yang diberi serta memahami keperluan mereka, memungkinan pelbagai potensi pencapaian yang kita sendiri tidak menduganya pada suatu masa dahulu," katanya.

Perdana Menteri juga berkata adalah tidak mustahil untuk negara menjadi contoh bagi kecemerlangan orang kurang upaya di rantau ini dalam tempoh yang singkat jika perancangan dan penyusunan aktiviti bagi golongan itu dibuat dengan rapi.

Beliau yakin semua pihak yang terlibat dengan pembangunan dan perancangan program sedemikian dapat melaksanakan tugas masing-masing dengan sempurna.

Mengenai penyediaan kemudahan bagi golongan itu di tempat kerja, kediaman, bangunan awam dan pengangkutan awam, Dr Mahathir berkata usaha ke arah itu sudahpun dilaksanakan melalui pindaan terhadap Undang-undang Kecil Bangunan yang Diseragamkan 1984.

Pindaan itu antara lainnya menepati ciri-ciri yang terdapat dalam Kod Amalan bagi Menyenangkan Orang Cacat Memasuki Bangunan Awam yang diluluskan pada tahun 1990 dan dipakai oleh kerajaan-kerajaan negeri.

Namun, katanya, beliau difahamkan Kod Amalan bagi Orang Cacat Di Luar Bangunan 1993 masih dalam proses untuk dilaksanakan.

Menteri Perpaduan Negara dan Pembangunan Masyarakat Datin Paduka Hajah jabatan kerajaan dan sektor swasta mengambil orang kurang upaya berkhidmat dengan mereka.

Kini terdapat 2,000 orang kurang upaya sedang berkhidmat dengan sektor swasta dan 1,000 dengan sektor awam.

"Sebilangan besar daripada golongan kurang upaya itu telah mengikuti skim latihan mengikut kemampuan mereka dan majikan tidak perlu khuatir untuk mengambil golongan yang terlatih itu berkhidmat dengan mereka," katanya.

Pada majlis itu, Dr Mahathir turut menyampaikan anugerah skim insentif kepada 21 ahli sukan orang kurang upaya. -- BERNAMA